

## САБАҚ **3** Сіздің Әкеңіз сізбен сөйлеседі

---

Қойлар қай уақытта тау бөктерінде жайылу керек, қай уақытта қораға қайту керек екенін қайдан біледі? Олар неге бейтаныс адамның соңынан ермейді? Қойлар өз бақташысының дауысын естіп соңынан ереді және бұл оларды қорғайды. Қой өз бақташысының даусын біледі, өйткені ол оны кішкентай қошақан кезінен бағып қамқорлап келеді. Ол басқа ешкімнің де соңынан ермейді.

Кейбір мағынада сіздің Құдаймен қарым-қатынасыңыз осы қой мен бақташының қарым-қатынасына ұқсас. Құдай сізді жетегіне алып, қамқорлағысы келеді. Ол сізге тура жолды көрсетіп, қауіп-қатерден сақтау үшін күнделікті сізбен сөйлеседі. Егер сіз әрдайым Оны тыңдасаңыз, соғұрлым Оның дауысын қатесіз ажырата аласыз. Басқалар сізді күмәндандыруға тырысқанымен де, сіз ненің дұрыс екенін білесіз.

Осы сабақ сізге Құдайдың сізбен қалай сөйлесетінін түсінуге көмектеседі. Кейде Ол сізге тікелей тіл қатады. Кейде Өзінің сөзі – Киелі Кітап арқылы тілдесетін болады. Ал тағы басқа жағдайларда басқа мәсіхшілер арқылы сөйлейді.

Сіз осы сабақты оқу арқылы Оның қандай әдісті қолданғанына қарамастан, Әкеңіздің дауысын тануды үйренесіз.

## ***Сіз осы сабақта келесі тақырыптарды оқып-білесіз***

---

- А. Құдай сізбен сөйлесуді қалайды.
- Ә. Құдай әр түрлі жолмен сөйлейді.
- Б. Құдайда сізге арналған Кітап бар.
- В. Құдайдың дауысын қалай есту керек.

## ***Осы сабақтың мақсаты***

---

1. Құдайдың сізбен неге сөйлескісі келетінін көрсететін себептерді айту.
2. Құдайдың сізбен сөйлесетін бірнеше жолдарын көрсету.
3. Құдайдың сізге арналған Кітабын сипаттау.
4. Күнделікті Құдайдың дауысын қалай естуді білу.

## **А. ҚҰДАЙ СІЗБЕН СӨЙЛЕСУДІ ҚАЛАЙДЫ**

**1 Мақсат.** Құдайдың сізбен неге сөйлескісі келетінін көрсететін себептерді айту.

Қандай әке тек күлімсіреп қана жауап беруге тиісті сәби болса да, өзінің балаларымен сөйлесуді ұнатпайды? Сіздің Көктегі Әкеңіз де Өзінің балаларымен сөйлескенді, оларға сүйіспеншілігін көрсеткенді, үйреткенді, мұқтаждарын қанағаттандыруды ұнатады. Оның дауысын естігіңіз келе ме?

## ***Тапсырма***

---

- 1 Құдай сізбен сөйлескісі келеді, өйткені Ол...
  - а) сізді Көктегі Әкеңіз ретінде жақсы көреді.
  - ә) барлық нәрсені жаратты.
  - б) не қаласа, соның бәрін істей алады.



## Ә. Құдай Әр Түрлі Жолмен Сөйлейді

**2 Мақсат.** Құдайдың сізбен сөйлесетін бірнеше жолдарын көрсету

Еврейлерге хат 1:1-2 аяттар былай дейді: «Өткен заманда Құдай әлденеше рет түрлі жолдармен өз хабарын ата-бабаларымызға пайғамбарлар арқылы жеткізіп отырған. Ал осы соңғы заманда Ол бізге хабарын Өзінің рухани Ұлын жіберіп жеткізді. Құдай Сол арқылы әлемді жаратып, Оны барлығының иесі етіп тағайындады». Төменде Құдайдың сізбен сөйлесу жолдары берілген.

### Тікелей жүрекке

Киелі Рух Исаның жаныңызда екенін сізге білдіреді. Ол бізге ар-ұжданымыз арқылы не істеу керек екенін сездіріп немесе нені істемеу керектігін ескертеді. Киелі Рух біз үшін рухани ақиқатты түсінікті етеді. Кейде Құдай сіздің бір нәрсе істегеніңізді қалайтынын сезесіз. Сиынғанда Құдайдың сізге сөйлеуін сұраңыз және жүрегіңізден Оның дауысын есту үшін күтіңіз.

### Тапсырма

---

**2** Құдай сіздің жүрегіңізге қалай тікелей сөйлей алады? Екі дұрыс жауапты шеңбермен қоршаңыз.

- а)** Біреу сізбен сөйлесіп тұрғандай, анық дауыс естисіз.
- ә)** Құдайдың сізден бір нәрсе істегеніңізді қалайтынын сезесіз.
- б)** Құдайдың дауысы міндетті түрде түс немесе бір көрініс арқылы естіледі.
- в)** Бір рухани ақиқат кенеттен нақты және түсінікті болады.

---

### Жарылқаулары арқылы

Көптеген мәсіхшілер жоғарыдан туылған уақыттан бастап бүкіл әлем оларға өзгеше көрінетінін айтады. Айналаңызға қарап, Құдайдың жарылқауларын сіз де жаңаша бағалай бастаған шығарсыз. Сіз табиғаттың кереметтерінде Оның қатысы барын сезіне аласыз. Құдай сізге музыка және өнер арқылы да сөйлеуі мүмкін. Сіз басқа мәсіхшілердің жақын достығы арқылы да Оны

сезе аласыз. Сізді қоршаған мыңдаған жарылқаулар сізге Құдайдың мейірімділігі жайлы айтады. Мінәжаттарыңызға жауап беру арқылы Құдай сізге сөйлейді. Сенімнің көзімен Құдайдың сізге: «Мен сені жақсы көремін. Сені жарылқағым келеді», – деген дауысын ести аласыз.

## ***Тапсырма***

---

- 3** Құдайдың сізге деген сүйіспеншілігін көрсететін жарылқауларды атап өтіңіз.
- .....
- .....



## **Ол басқа мәсіхшілер арқылы сөйлейді**

Кейде отбасында ересек балалар кішкентайларға былай дейді: «Жоқ, олай етпе! Анам осылай істегенінді ұнатпайды!» немесе «Қара, әкем осыны қалайды».

Құдай да осылай Мәсіхтегі аға-әпкелері арқылы өз балаларына сөйлейді. Ол біздің басқа мәсіхшілермен жиі қарым-қатынаста болып, солар арқылы жігер, кеңес және көмек алуымызды қалайды. Пауыл бізді былай жігерлендіреді: «Қайта, Киелі Рухқа кенеле беріндер! Сендер Мәсіхті қастерлейтіндіктен, бір-біріңе мойынсұныңдар!» (Еф. 5:18, 21).

## ***Тапсырма***

---

- 4** Сіздің өміріңізде басқа мәсіхшілердің сізден Құдайдың не қалайтыны жайлы түсінуге көмектескен жағдайлары болды ма?
- .....
- .....
- .....

- 5** Сізді жақсы мәсіхші болуға біреу жігерлендірді ме?

Кім? .....

- 6** Құдайға өзіңізге басқа мәсіхшілер арқылы сөйлегені үшін алғыс айтыңыз. Біреулерге құтқарылу алуға көмектесу немесе басқаларды Жаратқан Иенің артынан еруге жігерлендіруі үшін сізге тіл қатуын сұраңыз.



## Рухани дарындар және қызмет ету арқылы

Киелі Рух қауымға көптеген алуан түрлі рухани дарындар берді. Құдай сол дарындар арқылы сөйлейді. Ол Құдайдың қауымға деген үндеуін бағушыларға, ұстаздарға, Ізгі хабаршыларға және мәсіхші жазушыларға береді. Құдай Өзі туралы айту үшін барлық мәсіхшілерді қолданғысы келеді. Сондықтан сіздің қауым жиналысына неғұрлым жиірек барғаныңыз өте маңызды. Қауымға барған сайын Көктегі Әкенің сізге айтқысы келетін үндеуіне құлақ асыңыз. «Өйткені екі-үш адам Менің атымнан жиналса, Мен де сол жерде араларында боламын» (Мат. 18:20).

## Тапсырма

- 7** Құдайдың адамдарға қалай сөйлейтіні жайлы төменде айтылғандардан үш жауапты таңдаңыз:

- а)** Ізгі хабаршының уағызы арқылы.
- ә)** Медиум-спиритистер арқылы.
- б)** Балгерлер арқылы.
- в)** Мәсіхші бағушылар арқылы.
- г)** Мәсіхшілік әдебиеттер арқылы.

- 8** Қауымда болған кезде Құдайдың сізге тіл қатуын күтесіз бе?

.....

- 9** Осы кітап арқылы Құдай сізге сөйледі ме? .....
- Әр сабақта Оның сізге тіл қатуын сұраңыз.



## Өлең арқылы

Құдай сізге рухани әндердің немесе туындылардың сөздері арқылы жиі сөйлейді. Құдай кейбір рухани өлеңдердің сөзін, сондай сөздерге мұқтаж болып тұрған кезіңізде, есіңізге жиі салып тұратынына әлі таң қалатын боласыз. Пауыл Ефестегі сенушілерді: «Бір-бірінді Забур жырлары, мадақтау өлеңдері және Киелі Рух дарытқан әндер арқылы жігерлендіріп, Иемізді ән-күймен шын жүректен дәріптендер» (Еф. 5:19) – деп шақырады.

### Тапсырма

---

- 10** Тәңірден сіздің қауымда айтылатын өлеңдер мен гимндердің сөздерін тезірек жаттап алуға көмектесуін сұраңыз. Үйде, мүмкіндігінше, сол өлеңдерді жиі айтып жүріңіз.
- 11** Сіз өлең айтып жүргенде, өлеңнің сөздерінде не жайлы айтатынын ойланып жүруді әдетке айналдырыңыз. Сіздің өміріңізде орындалса екен деген рухани ақиқат жайлы айтылатын ән бар ма? Төменде берілген орынға сол ақиқатты жазып, Құдайдан соны өміріңізде қолдануыңызға көмектесуін сұраңыз.
- .....
- .....



## Киелі Кітап арқылы

Құдай сізге өзінің Киелі Кітабы арқылы сөйлейді. Бұл – Құдайдың жолдауын білдіретін ең сенімді әдіс. Бағушы сізге деген Құдайдың еркі қандай екенін әрдайым біле алмайды. Мәсіхтегі аға-әпкелеріңіз сізге бұрыс кеңес беруі мүмкін. Түс және аяндар да әрқашан Құдайдан келе бермейді. Түсіңізге күндізгі ой-толғаныстарыңыз немесе түпсанаңыздағы нәрселер кіруі мүмкін. Кейде Құдай сізден әлдебір нәрсені іске асырғаныңызды күтетін сияқты болып көрінеді, дегенмен бұл тек сіздің жеке арманыңыздың түрткісі. Сонымен Құдайдың дауысын қалай тануға болады?

Құдайдың сізге деген жолдауы Киелі Кітапта жазылған. Сіз Құдайдың басқаша тіл қату жолдарын Құдайдың Киелі Кітаптағы айтқан сөздерімен тексеруіңіз керек. Міне, сондықтан қазір істеп жатқаныңыздай, Құдай Сөзін зерттеп оқу өте маңызды. Осы жеңіл құрал арқылы Киелі Кітапты жақсырақ түсінетін боласыз. Сонымен қатар Киелі Кітап тәлімдерін өміріңізде қалай қолдануды үйренесіз.

«Рухани көзімді аша гөр менің, Тәліміңнен кереметтер көрейін» (Забур жыры 118:18).

«Сенің айтқан сөздерің, Жаратқан Ием, Көкте тұр мәңгілікке бекітілген!» (Забур жыры 118:89).

«Сенің сөздерің қадамдарымды жарқыратады, Өмір жолыма шам-шырақтай нұрын шашады» (Забур жыры 118:105).

«Мәнісі ашылғанда сөздерің нұрын шашады, Білімсіздердің де санасын оятып ашады» (Забур жыры 118:130).

«Түп-тамырымен ақиқат Сенің сөздерің, Әділетті де мәңгілік әрбір шешімің» (Забур жыры 118:160).

## Тапсырма

---

**12** Құдайдың жолдауын білдіретін ең сенімді әдіс?

- а) Құдай Киелі кітапта не айтатынын зерттеп білу.
- ә) Достарымыздың кеңесін тыңдау.
- б) Өз сезімдерімізге арқа сүйеу.



## Б. Құдайда Сізге Арналған Кітап Бар

**3 Мақсат.** Құдайдың сізге арналған кітабын сипаттау

### Тікелей жүрекке

Киелі Кітап 66 кітаптан тұрады. Шамамен 1600 жыл ішінде әртүрлі 40 адам жазды. Осы адамдар – Құдайдың таңдап алған адамдары еді, не жазу керектігін білуге көмектесу үшін Құдай оларға Киелі Рухын жіберді. Нәтижесінде бізде Құдайдың өзімізге арнаған жолдауы бар. Алпыс алты кітап бірігіп Киелі Жазба деп аталады. Осы барлық кітаптардың арасында керемет үйлесім бар. Олардың барлығы бір тақырыпты бірлікте дамытып жетілдіргендіктен, барлық кітаптардың тек бір автордан – Құдайдан келгенін білеміз.

## Тапсырма

---

**13** Төмендегі сөйлемдердің қайсысы дұрыс?

- а) Киелі Кітап әр түрлі 66 кітаптан тұрғанымен де, тек бір ғана тақырыпты меңзейді.
- ә) Киелі Кітаптың ішіндегі әр кітапты жазған әрбір адамды Киелі Рух жетеледі.
- б) Киелі Кітаптағы 66 кітаптың барлығы бір уақытта жазылған.



Сенімге ерекше берілген адамдар Құдай рухтандырған алпыс алты кітаптың ерекше сапасын мойындады. Иса туылғаннан кейін шамамен екі жүз жылдан кейін алпыс алты кітап жиналып бір кітап, Киелі Кітапқа, айналды. Киелі Кітап дегеніміз – Құдайдың кітаптары деген мағынаны білдіреді. Алдыңғы 39 кітап Тәңіріміз Иса Мәсіх туылғанға дейін жазылған. Олар «Көне Келісім» деп аталады. Киелі Кітаптың екінші бөлімі «Жаңа Келісім» деп аталады. Ол Иса Мәсіх жерге келіп, Құдай мен адам арасындағы жаңа келісімді бекіткеннен кейін жазылған 27 кітапты құрайды. Екінші бөлімдегі кітаптар жаңа келісімнің шарттарын береді.

Көне Келісімнің үлкен бөлігі алдымен еврей тілінде, ал Жаңа Келісім – грек тілінде жазылған. Көне Келісімнің кішігірім бөлігі арамей тілінде жазылған. Құдай Өз кітабын барлық адамзатқа беріп, әрбір адамның осы кітапты оқығанын қалайды. Құдай Өзінің балаларына оны әр қилы тілдерге аударуға көмектеседі. Қазіргі уақытта Киелі Кітаптың жеке бөлімдері 3000-нан аса тілдерге аударылған.

## Тапсырма

---

**14** Киелі Кітаптың бөлімдерін (үстінде) төмендегі сипаттамаларға (астында) сәйкес салыстырыңыз

- |   |                 |
|---|-----------------|
| ... а) жаңа келісім туралы айтады.      | 1) Көне Келісім |
| ... ә) негізгі бөлігі еврейше жазылған. | 2) Жаңа Келісім |
| ... б) 27 кітап.                        |                 |
| ... в) 39 кітап.                        |                 |
| ... г) грекше жазылған.                 |                 |
| ... ғ) Иса туылғанға дейін жазылған.    |                 |



Кейбір тілдерде Киелі Кітап аудармаларының бірнеше нұсқасы бар. Мәсіхші бағушы немесе ұстаз сіздің тіліңіздегі сізге лайық ең жақсы аударма нұсқасын таңдауға көмектесуі мүмкін. Біздің оқулықтағы барлық Киелі Кітап аяттары Киелі Кітаптың Қазақ тіліндегі Библия 2019 аудармасынан алынған.

## Тапсырма

---

### 15 Киелі Кітап -

- а) тек еврей, арамей және грек тілін білетін білімді адамдарға арналған.
- ә) барлық адамдарға арналған.
- б) тек бағушылар мен қызметшілерге арналған.



## Киелі Кітап сілтемелері

Киелі Кітаптың барлық кітаптары тарауларға бөлінген. Барлық тараулар аяттар деп аталатын ұсақ азат жолдарға бөлінген. Тараулар мен аяттар санмен белгіленген, бұл бізге Киелі Кітаптың қажетті жерін табуды жеңілдетеді. Егер сіз Киелі Кітаптың бір жерін жазып алғыңыз келсе, алдымен кітаптың атын, тараудың санын және қос нүктеден (:) кейін аяттың санын жазыңыз. Мысалы, «Жохан 3:16» – Жохан жазған Ізгі хабар, 3-тарау, 16-аят дегенді білдіреді.

Екі немесе кезексіз келетін бірнеше аятты белгілеу үшін оларды үтірмен айырамыз. Мысалы, «Жохан 3:16, 18, 20» деген Жохан жазған Ізгі хабар, 3-тарау, 16, 18, және 20-аяттар болады.

Аяттардың ортасындағы дефис (-) ортадағы аяттардың барлығы кіретінін білдіреді. Мысалы, «Жохан 3:16-22», демек Жохан жазған Ізгі хабар, 3-тарау, 16-дан 22-ге дейінгі аяттар дегенді білдіреді.

Дефис бірінен соң бірі келетін екі аяттың ортасына да қойылады. Мысалы, «Жохан 3:16-17».

Егер аяттар әр түрлі тараулардан болса, оларды нүктелі үтірмен (;) бөледі. Мысалы, «Жохан 3:16; 6:24» дегеніміз, Жохан жазған Ізгі хабар, 3-тарау, 16-аят және 6-тарау, 24-аят дегенді білдіреді.

## Тапсырма

---

- 16** Матай жазған Ізгі хабар, 6-тарау, 31, 32 және 33-аяттар сілтемесінің дұрыс жазылуын көрсетіңіз.
- Матай 31-32 және 33.
  - Матай 6:31-32 және 33.
  - Матай 6:31-33.
- 17** «Лұқа 13:18-19; 20:25-26» сілтемесі нені білдіреді?
- 13 Тарау Лұқадан, аяттар 18, 19, 20, 25 және 26.
  - Лұқа жазған Ізгі хабар, 13-тарау, 18 және 19-аяттар және 20-тарау, 25 және 26-аяттар.

---

## В. Құдайдың Дауысын Қалай Есту Керек

**4 Мақсат.** Күнделікті Құдайдың дауысын қалай естуді білу.

Біз қайсыбір радиостанцияны тыңдау үшін алдымен радионы қажетті толқынға келтіреміз. Біз өзіміздің рухымыз бен жүрегімізді Құдай даусының толқынына қалай келтіре аламыз? Сізге берілетін бірнеше кеңестер:

- Киелі Кітапты күнделікті оқыңыз.
- Киелі Кітаптан оқығандарыңыз жайлы ойланыңыз. Жазба туралы ойланып-толғаныңыз.
- Қайталап оқуды және өзіңізге ұнаған аяттарды жаттап алуды әдетке айналдырыңыз.

«Киелі жазбалардың бәрі Құдай Рухының жетелеуімен жазылған. Олар тәлім беру, әшкерелеу, түзету әрі әділдікке тәрбиелеу үшін тиімді» (2 Тім. 3:16-17).

Егер сіз Киелі Кітапты алғаш рет оқи бастасаңыз, онда Жаңа Келісімдегі Марқа жазған Ізгі хабардан бастаңыз. Құдай сізге Иса Мәсіхтің Өмірі мен Оның тәлімдері арқылы айқын сөйлеп және сіздің Көне Келісімді түсінуіңізге көмектеседі.

«Өткен заманда Құдай әлденеше рет түрлі жолдармен өз хабарын ата-бабаларымызға пайғамбарлар арқылы жеткізіп отырған. Ал осы соңғы заманда Ол бізге хабарын Өзінің рухани Ұлын жіберіп жеткізді. Құдай Сол арқылы әлемді жаратып, Оны барлығының иесі етіп тағайындады» (Евр. 1:1-2).

- Құдайдың дауысын естуді күтіп, қауымға ұдайы барып тұрыңыз.
- Күнделікті сиыныңыз. Құдайдан сізге тіл қатуын сұраңыз. Сиыну кезінде өзіңіздің ойларыңызды жинақтап және басқа нәрселерге көңіл аудармау үшін көзіңізді жұмуға болады. Сиынған уақыттың бәрінде сөйлей бермеңіз, көп сөзді көпіртіп айта бермеңіз, қайта тыныштықта Құдайдың сізге тіл қатуын күтіңіз.
- Рухани әндер айтып, олардың сөздеріне терең мән беріп ойланыңыз.
- Айналаңыздағы сізді қоршаған барлық нәрседен Құдайдың ізгілігін, сүйіспеншілігін және құдіретін көруді үйреніңіз.
- Мәсіхшілік әдебиеттерді оқыңыз және мүмкіншілігіңіз болса рухани бағдарламаларды тыңдаңыз.
- Басқа мәсіхшілермен Құдай және Оның Сөзі жайлы сөйлесіңіз.
- Құдай сізден нені қалайды, соны істеңіз. Есіңізде болсын, егер Ол сізге жолбасшы болсын десеңіз, сіз Оның артынан еруге дайын болуыңыз керек.
- Осы кітаптағы сабақтарды және өзге де Киелі Кітап сабақтарын дұрыс орындап, Құдайдан солар арқылы сізге тіл қатуын сұраңыз.

## **Тапсырма**

---

- 18** Құдайдың даусын естуге көмектесетін жоғарыда аталған кеңестерді қайталап оқып шығыңыз және орындап жүргендеріңізді белгілеңіз. Тұрақты орындамай немесе ешқашан орындамай жүргендеріңіз болса, сол жайлы сиыныңыз. Іс жүзінде қолданамын деген кеңестердің астын сызып белгілеңіз.



## Өз жауаптарыңызды тексеріңіз

---

**13 а) және б)** сөйлемдері.

**14 а) 2) Жаңа Келісім**

**ә) 1) Көне Келісім**

**б) 2) Жаңа Келісім**

**в) 1) Көне Келісім**

**г) 2) Жаңа Келісім**

**ғ) 1) Көне Келісім**

**1 а)** сізді Көктегі Әкеңіз ретінде жақсы көреді.

**15 ә)** барлық адамдарға арналған

**2 ә) және в)**

**16 б)** Мат. 6:31-33

**12 а)** Құдай Киелі Кітапта не айтатынын зерттеп оқу.

**17 ә)** Лұқа жазған Ізгі хабар, 13-тарау, 18 және 19-аяттар және 20-тарау, 25 және 26-аяттар.

**7 а)** Ізгі хабаршының уағызы арқылы.

**в)** Мәсіхші бағушылар арқылы.

**г)** Мәсіхшілік әдебиеттер арқылы.